

# “Auguri e mònitu pi lu Natali a Caniattì”

di peppecaruso

Anchi chist' annu arrivanu li Festi di Natali  
e cuminciammu a marturiàrini la menti:  
«Pipiù? Cuesti e sansizza? Così dunci e li rigali?»  
Scurdànnuni a cu di tutti 'ssi così 'un n'havi nenti.

Pi li Cristiani chissu è lu tiempu ca nasci lu Signuri:  
lu sfarzu, ca è profanu, a lu sacru fa custioni.  
Lu Bamminu avia vicinu sulu quarchi pòviru pasturi  
muertu di fami. Antru ca schiticchi e lu viglioni!

A la tivvù n'avvisanu ca c'è crisi;  
ognunu dici: «Ma a 'ssa cosa sulu ju ci haiu a pinsari?  
Accamora m'addiviertu ni 'ssu misi,  
e doppu li Tri Re 'ncumienciu a sparagnari.»

Picciuetti mia, ju la piensu ni 'ssu modu:  
«Cu havi e cu nun havi, assittati ni la stessa tavulata,  
mangiammu tutti, ma cchiù picca, sucannu anchi lu brodu  
e pi lu Fistiggiatu 'ssu rigalu è cosa grata!»

Ora m'attocca di finiri 'ssa canzuna:  
cu l'Auguriu di passarivilla tutti bona,  
stringiu li manu forti a una a una,  
a li Caniattinisi residenti e a chiddri fora zona!

Dicembre 2008

Pagina Principale: <http://www.solfano.it>